

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ՀԱՅՏԱՐԱՐՈՒԹՅՈՒՆ

ԲՈՂՈՔԻ ՆԵՐԿԱՅԱՑՄԱՆ ՎԵՐԱԲԵՐՅԱԼ

Բողոքի ծածկագիրը և ամսաթիվը՝ ԳԲՔԱ-ԼՕ-2022/05, 17.01.2022թ.

Բողոք բերող անձ՝ «Էլջեն» ՍՊԸ

Պատվիրատու՝ «Երքադլույս» ՓԲԸ

Գնման ընթացակարգի ծածկագիրը՝ «ԵՔԼ-ԲՄԱՊՁԲ-22/1» բաց մրցույթ

Գնման առարկան՝ լուսատեխնիկական ապրանքների ձեռքբերում

Բողոքի պահանջը՝ պարտավորեցնել «ԵՔԼ-ԲՄԱՊՁԲ-22/1» ծածկագրով բաց մրցույթի գնահատող հանձնաժողովին գնման ընթացակարգը 1-ին, 2-րդ և 3-րդ չափաբաժինների մասով հայտարարել չկայացած:

**ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ՝ Լ. ՕՀԱՆՅԱՆ
ՔԱՐՏՈՒՂԱՐ՝ Ռ. ՄԿՐՏՉՅԱՆ**

Նիստերին կարելի է առցանց հետևել <https://www.e-gov.am/gnumner/> հղումով.

Տեղեկացնում ենք, որ «Գնումների մասին» ՀՀ օրենքի՝

- 50-րդ հոդվածի 10-րդ մասի համաձայն՝ յուրաքանչյուր անձ, որի շահերը խախտվել են կամ կարող են խախտվել բողոքարկման հիմք ծառայած գործողությունների արդյունքում, իրավունք ունի մասնակցելու բողոքարկման ընթացակարգին՝ մինչև բողոքի վերաբերյալ որոշում ընդունելու ժամկետը գնումների հետ կապված բողոքներ քննող անձին ներկայացնելով համանման բողոք: Նույն հոդվածի համաձայն՝ բողոքարկման ընթացակարգին չմասնակցած անձը զրկվում է գնումների հետ կապված բողոքներ քննող անձին համանման բողոք ներկայացնելու իրավունքից,

- 51-րդ հոդվածի 1-ին մասի համաձայն՝ գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ նույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

ՀՀ գնումների հետ կապված
բողոքներ քննող անձին

Բողոքաբեր՝

«Էլջեն» ՍՊԸ-ից
գրանցման համար՝ 290.110.33233
հասցե՝ ք. Երևան, Խորենացու 28

«Էլջեն» ՍՊԸ-ի

ներկայացուցիչ Հարություն Օհանյան
նույնականացման քարտի տվյալներ՝ 004176392,
տրված 05.06.2014թ.-ին, 004-ի կողմից

Պատվիրատու՝

«Երքադրոյս» ՓԲԸ, հասցե
ք. Երևան, Բուզանդի 1/4

ընթացակարգի ծածկագիրը և առարկան՝

ԵՔԼ-ԲՄԱՊՁԲ-22/1
լուսատեխնիկական ապրանքներ

ԲՈՂՈՔ

I. Գործի նախապատմությունը.

08.12.20212.-ին «Երքադրոյս» ՓԲԸ-ն (այսուհետ՝ Պատվիրատու) հայտարարել է թիվ ԵՔԼ-ԲՄԱՊՁԲ-22/1 ծածկագրով բաց մրցույթ (այսուհետ՝ Մրցույթ): Մրցույթի գնման առարկան է լուսատեխնիկական ապրանքներ, որոնք խմբավորված են 3 չափաբաժիններում (այսուհետ՝ Գնման առարկաներ): Գնման առարկաների տեխնիկական բնութագրերը խտրական են և սահմանափակում են մասնակիցների մասնակցությունը Մրցույթին, քանի որ տեխնիկական բնութագրերում սահմանված ձևական պահանջների պատճառով հնարավոր չէ Մրցույթին առաջարկել ավելի լավ և էներգախնայող հատկանիշներով օժտված լուսատեխնիկական ապրանքներ: Հրավերով սահմանված տեխնիկական բնութագրերից տպավորությունն այնպիսին է, որ միլիմետրերով սահմանված Գնման առարկաների արտաքին չափերը ավելի կարևոր են քան լուսատուի բուն ֆունկցիոնալ հատկանիշները, այն է ֆոտոմետրիկ և էլեկտրական պարամետրերը, ընդ որում այդ չափերից որոշը հիմնավորված չեն, օրինակ՝ լուսատուների մատրիցայի չափը, մոնտաժային անցքի տրամաչափը, «լուսատու լեդ 50»-ի մոնտաժման հատվածի հաստությունը, լուսադիողների և ոսպնյակների քանակը: Բացի այդ, հրավերում նշված է, որ լուսատուները անցնելու են «Երքադրոյս» ՓԲԸ-ում լուսատեխնիկական լաբորատորիայի հետազոտություն՝ ստուգվելու են բոլոր պարամետրերը (հզորություն, կելվին, լյումեն, և այլն) որոնք պետք է համապատասխանեն տեխնիկական բնութագրերին, սակայն հրավերում նշված չէ թե

ինչ մեթոդով են այդ ստուգումները անցկացվելու, հարկ է նշել, որ դրսի լեդ լուսավորության ստուգման միջազգայնորեն ընդունված մեթոդներից մեկը դա LM-79 թեստ մեթոդն է: Արդյունքում այս ամենը առաջացնելու է անբարեդիղ մրցակցություն և սահմանափակվելու է մասնակիցների ու մասնակիցների կողմից առաջարկվող ապրանքների քանակը, որի հետևանքով առաջարկվելու են ավելի վատ որակի լույսեր քան կառաջարկվեին, եթե Գնման առարկաների տեխնիկական բնութագրերը սահմանվեին հարկ եղած ձևով:

Վերոգրյալի հետևանքով «Էլջեն» ՍՊԸ-ն (այսուհետ՝ Ընկերություն) զրկվել է իր ապրանքները առաջարկելու հնարավորությունից, Ընդ որում այդ ապրանքներից որոշները ավելի էներգախնայող են քան հրավերով սահմանվածը:

II. Բողոքի համար էական նշանակություն ունեցող փաստական հանգամանքները.

1) 1-ին, 2-րդ և 3-րդ չափաբաժինների տեխնիկական բնութագրերում նշված է համապատասխանաբար, որ «լուսատու լեդ 50»-ի հզորությունը պետք է լինի 50 վատտ ($\pm 5\%$) իսկ լուսատվությունը ոչ պակաս 4500 լյումենից, «լուսատու լեդ 100»-ի հզորությունը պետք է լինի 100 վատտ ($\pm 5\%$) իսկ լուսատվությունը ոչ պակաս 8300 լյումենից, «լուսատու լեդ 150»-ի հզորությունը պետք է լինի 150 վատտ ($\pm 5\%$) իսկ լուսատվությունը ոչ պակաս 12300 լյումենից:

2) 1-ին, 2-րդ և 3-րդ չափաբաժինների տեխնիկական բնութագրերում նշված է, որ լուսատուները պետք է բաղկացած լինեն մեկ մատրիցայից, որոնք հավաքված են համապատասխանաբար՝ «լուսատու լեդ 50»-ը 70 հատ լուսադիոդից, «լուսատու լեդ 100»-ը 120 հատ լուսադիոդից, իսկ «լուսատու լեդ 150»-ը 180 հատ լուսադիոդից:

3) 1-ին, 2-րդ և 3-րդ չափաբաժինների տեխնիկական բնութագրերում նշված է լուսատուի և իրանի չափը, և մատրիցայի չափը:

4) 1-ին չափաբաժնի տեխնիկական բնութագրում նշված է, որ մոնտաժային անցքի տրամաչափը պետք է լինի 44-50մմ իսկ մոնտաժման հատվածը կլոր: 01.11.2022թ.-ին www.gnumner.am կայքում հրապարակված պարզաբանմամբ Պատվիրատուն նշել է, որ լուսատուների մոնտաժումը իրականացվելու մինչև 44 մմ հաստությամբ խողովակների վրա:

5) 1-ին չափաբաժնի տեխնիկական բնութագրում նշված է, որ մոնտաժման հատվածի պատի հաստությունը պետք է լինի առնվազն 7մմ: 2-րդ և 3-րդ չափաբաժինների տեխնիկական բնութագրերում նշված է, որ մոնտաժման հատվածի պատի հաստությունը պետք է լինի առնվազն 3մմ: Մինչդեռ 1-ին չափաբաժնում նշված լուսատուի քաշը ավելի թեթև է քան 2-րդ և 3-րդ չափաբաժիններում նշված լուսատուներինը:

6) Հրավերում նշված է, որ լուսատուները անցնելու են «Երքաղլույս» ՓԲԸ-ում լուսատեխնիկական լաբորատորիայի հետազոտություն՝ ստուգվելու են բոլոր պարամետրերը (հզորություն, կելվին, լյումեն, և այլն) որոնք պետք է համապատասխանեն տեխնիկական բնութագրերին, սակայն հրավերում նշված չէ թե ինչ մեթոդով են այդ ստուգումները անցկացվելու: Բացի այդ, տեխնիկական բնութագրում նշված ՀՀ կառավարության 2005թ.-ի փետրվարի 3-ի թիվ 150-Ն որոշումը, որին ըստ հրավերի պետք է համապատասխանեն ձեռքբերման ենթակա լուսատուները, ուժը կորցրել է:

III. Բողոքի հիմքերն ու հիմնավորումները.

«Գնումների մասին» ՀՀ օրենքի (այսուհետ՝ Օրենք) 3-րդ հոդվածի 1-ին և 2-րդ մասի համաձայն.

«1. Սույն օրենքի նպատակն է ապահովել գնումների գործընթացում հատուցման դիմաց արժեք, այն է՝

1) պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերում՝ համարժեք հատուցմամբ.

2) գնումների և գնումների գործընթացի տնտեսող, արդյունավետ և օգտավետ իրականացում:

2. Գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:»:

Օրենքի 13-րդ հոդվածի 2-րդ մասի 1-3-րդ կետերի համաձայն.

«2. Գնման առարկայի բնութագրերը՝

1) պետք է մրցակցության հավասար պայմաններ ապահովեն հնարավոր մասնակիցների համար.

2) չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը.

3) պետք է լինեն օբյեկտիվորեն հիմնավորված և համարժեք լինեն այն կարիքին, որի բավարարման նպատակով կատարվում է տվյալ գնումը:»:

ՀՀ կառավարության 04 մայիսի 2017 թվականի թիվ 526-Ն որոշման 1-ին կետով հաստատված «Գնումների գործընթացի կազմակերպման կարգ»-ի (այսուհետև նաև՝ **Կարգ**) 22-րդ կետի համաձայն՝ գնման առարկայի բնութագրերը սահմանելիս պետք է

հաշվի առնել, որ դրանց պետք է բավարարեն մեկից ավելի հնարավոր մասնակիցներ և արտադրողներ՝ բացառությամբ գնումը սույն կարգի 23-րդ կետի 4-րդ ենթակետով նախատեսված հիմքով կատարելու դեպքերի:

Վերոգրյալից հետևում է, որ գնման գործընթացի նպատակն է համարժեք հատուցմամբ ձեռքբերել պատվիրատուի պահանջմունքներին համապատասխանող ապարանք, այն է՝ ապրանք, որը իր որակական և տեխնիկական հատկանիշներով պիտանի է ծառայեցնելու պատվիրատուի լիազորությունների սահմաններում իրականացվող գործողություններին: Ընդ որում Պատվիրատուն պետք է ընդլայնի մասնակիցների շրջանակը, իսկ գնման գործընթացը կազմակերպելիս պատվիրատուի կազմած գնման առարկայի տեխնիկական բնութագիրը, պետք է լինի օբյեկտիվորեն հիմնավորված, ոչ խտրական, բավարարի առնվազն երկու հնարավոր մասնակիցների և արտադրողների կողմից առաջարկվող ապրանքներին, և չառաջացնի չհիմնավորված խոչընդոտներ գնման գործընթացում:

Ինչպես երևում է սույն գործի փաստական հանգամանքներից 1-ին, 2-րդ և 3-րդ չափաբաժինների տեխնիկական բնութագրերում Պատվիրատուն սահմանել է մի շարք հատկանիշներ որոնք անհիմն սահմանափակում են մասնակիցների, մասնավորապես Ընկերության մասնակցությունը Մրցույթին: Այդ սահմանափակումներից է տեխնիկական բնութագրում նշված «Վատտ»-ի նվազագույն սահմանաչափը, լուսատուի լուսադիոդների քանակը, լուսատուի մատրիցայի չափերը, 1-ին չափաբաժնում մոնտաժային անցքի տրամաչափը և մոնտաժային հատվածի պատի հաստությունը: Մասնավորապես՝

- «Վատտ»-ի նվազագույն սահմանաչափը Ընկերության մասնակցությունը Մրցույթին սահմանափակում է, քանի որ այդ սահմանափակումով Ընկերությունը զրկվել է ավելի բարձր էներգախնայողություն ունեցող, այսինքն՝ ավելի ցածր «Վատտ»-ով բայց նույն կամ ավելի բարձր լուսատվությամբ լուսատուներ Մրցույթին առաջարկելու հնարավորությունից: Օրինակ՝ Ընկերությունը կարող է առաջարկել 30 վատտ հզորությամբ լուսատու որն ունի 4500 լյումեն և 100 վատտ հզորությամբ լուսատու որն ունի 15000 լյումեն, այսինքն՝ այդ լուսատուները ծախսելով հրավերի 1-ին և 3-րդ չափաբաժիններով սահմանված լուսատուներից ավելի քիչ էներգիա տալիս են նույնքան կամ ավելի շատ լյումեն լույս որքան սահմանված է այդ նույն չափաբաժիններով:

- Լուսատուի լուսադիոդների քանակը Ընկերության մասնակցությունը Մրցույթին սահմանափակում է, քանի որ Ընկերության որոշ լուսատուների լուսադիոդների քանակը ավելի քիչ է քան սահմանված է հրավերով, սակայն այդ լուսատուների

լուսատվությունը (յուրմենը) համապատասխանում է հրավերով սահմանված լուսատվության չափանիշներին:

- Մատրիցայի չափը նշելու պատճառով Ընկերության մասնակցությունը Մրցույթին նույնպես անհիմն սահմանափակվում է, քանի որ իրանի չափը նշելով Պատվիրատուն արդեն իսկ սահմանել է լուսատուի իր համար ցանկալի կամ ընդունելի չափերը, հետևաբար մատրիցայի չափը նշելով Պատվիրատուն անուղղակիորեն սահմանափակում է տվյալ մրցույթին Ընկերության մասնակցությունը, քանի որ Ընկերության լուսատուների մատրիցայի չափերը չնչին բայց տարբերվում են հրավերով սահմանվածից, մինչդեռ այդ նույն լուսատուների իրանի չափերը համապատասխանում են հրավերով սահմանվածին և կարող են ապահովել հրավերով սահմանված լուսատվությունը:

- 1-ին չափաբաժնի տեխնիկական բնութագրում նշված է, որ մոնտաժային անցքի տրամաչափը պետք է լինի 44-50մմ իսկ մոնտաժման հատվածը կլոր: 01.11.2022թ.-ին www.gnumner.am կայքում հրապարակված պարզաբանմամբ Պատվիրատուն նշել է, որ լուսատուների մոնտաժումն իրականացվելու է **մինչև 44** մմ հաստությամբ խողովակների վրա: Այսինքն, ստացվում է, որ Պատվիրատուն լուսատուի մոնտաժային անցքի 44 մմ նվազագույն շեմը սահմանել է սխալ, քանի որ ըստ պարզաբանման խողովակը որին պետք է մոնտաժվի լուսատուն հնարավոր է լինի հենց 44 մմ, հետևաբար եթե Պատվիրատուին մատակարարվի 44մմ մոնտաժային անցքով լուսատու ապա վերջինս չի կարողանալու դրանք մոնտաժել 44մմ-ոց խողովակներին: Բացի այդ, 44մմ-ից փոքր խողովակները սովորաբար լինում են 40մմ հաստությամբ: Ընկերությունը Մրցույթի շրջանակներում 1-ին չափաբաժնի համար կարող է առաջարկել լուսատու, որի հատկանիշները համապատասխանում են հրավերով սահմանվածին բացի մոնտաժային անցքի տրամաչափից, մասնավորապես՝ Ընկերության առաջարկած լուսատուի մոնտաժային հատվածի տրամաչափը 42.7 մմ, որը նույնպես կարող է մոնտաժվել 40մմ խողովակին, այսինքն՝ 42.7 մմ մոնտաժային հատվածի տրամաչափը պետք է բավարարի Պատվիրատուի պահանջներին: Հետևաբար մոնտաժային անցքի համար 44մմ նվազագույն տրամաչափի սահմանելը անհիմն սահմանափակում է Ընկերության մասնակցությունը Մրցույթին:

- 1-ին չափաբաժնի տեխնիկական բնութագրում նշված է, որ մոնտաժման հատվածի պատի հաստությունը պետք է լինի առնվազն 7մմ: Սակայն 1-ին չափաբաժնի համար նման նկարագիր սահմանելը դուրս է տրամաբանությունից, քանի որ 2-րդ և 3-րդ չափաբաժինների տեխնիկական բնութագրերում նշված է, որ մոնտաժման հատվածի պատի հաստությունը պետք է լինի առնվազն 3մմ: Մինչդեռ 1-ին չափաբաժնում նշված լուսատուի քաշը ավելի թեթև է քան 2-րդ և 3-րդ չափաբաժիններում նշված լուսատուներինը, այն պարզ պատճառով, որ 1-ին

չափաբաժնով սահմանված լուսատուի հզորությունը ավելի քիչ է քան 2-րդ և 3-րդ չափաբաժիններով սահմանված լուսատուներինը:

Հրավերում նշված է, որ լուսատուները անցնելու են «Երքադլույս» ՓԲԸ-ում լուսատեխնիկական լաբորատորիայի հետազոտություն՝ ստուգվելու են բոլոր պարամետրերը (հզորություն, կելվին, լյումեն, և այլն) որոնք պետք է համապատասխանեն տեխնիկական բնութագրերին, սակայն հրավերում նշված չէ թե ինչ մեթոդով են այդ ստուգումները անցկացվելու: Բացի այդ, տեխնիկական բնութագրում նշված ՀՀ կառավարության 2005թ.-ի փետրվարի 3-ի թիվ 150-Ն որոշումը, որին ըստ հրավերի պետք է համապատասխանեն ձեռքբերման ենթակա լուսատուները, ուժը կորցրել է: Նման պայմաններում պարզ չէ և անհասկանալի է թե Պատվիրատուն ինչպես պետք է պարզի իրեն հանձնված լուսատուների համապատասխանությունը հրավերով սահմանված տեխնիկական բնութագրին, քանի որ տարբեր միջավայրերում նույն լուսատուն տալիս է տարբեր ցուցանիշներ: Բացի այդ, դժվարանալու է նաև իրացնել «Գնումների մասին» ՀՀ օրենքի 5.1-րդ հոդվածով սահմանված իրավունքը, քանի որ փորձաքննության հստակ մեթոդ սահմանված չլինելու պայմաններում հնարավոր չէ որոշել լուսատուների աշխատանքային իրական հնարավորությունները, այն է համապատասխանում են արդյոք լուսատուները հրավերով սահմանված տեխնիկական բնութագրերին թե ոչ:

Ամփոփելով վերոգրյալը կարող ենք եզրահանգել, որ տեխնիկական բնութագրերը խտրական են և սահմանափակում են մասնակիցների, այդ թվում Ընկերության մասնակցությունը Մրցույթին, ավելին տեխնիկական բնութագրերում նշված որոշ հատկանիշների սահմանափակումներ, մասնավորապես՝ «վատտ»-ի նվազագույն շեմ սահմանելը ակնհայտորեն ձեռնտու չէ նաև պետությանը, քանի որ առանց այդ սահմանափակումների հնարավոր էր առաջարկել բարձր լուսատվությամբ ավելի տնտեսող լուսատուներ:

Ելնելով վերոգրյալից և առաջնորդվելով Օրենքի 46-րդ և 50-րդ հոդվածներով.
Խնդրում ենք՝

պարտավորեցնել ԵՔԼ-ԲՄԱՊՁԲ-22/1 ծածկագրով բաց մրցույթի գնահատող հանձնաժողովին գնման ընթացակարգը 1-ին, 2-րդ և 3-րդ չափաբաժինների մասով հայտարարել չկայացած:

Կից ներկայացնում ենք.

1 Բողքի վճարը վճարած լինելը հավաստող փաստաթղթեր,

2 Հայցվորի պետական գրանցման վկայականի պատճենը,
3 Ներկայացուցչի լիազորագիրը:

«Էլքեն» ՍՊԸ-ի
Ներկայացուցիչ Հարություն Օհանյան

Digitally signed by OHANYAN
HARUTYUN 4009830433
